



REPUBLIKA E SHQIPËRISË
AUTORITETI I KONKURENCËS
KOMISIONI I KONKURENCËS

VENDIM

Nr. 686, Datë 06.04.2020

“Mbi autorizimin e përqendrimit të realizuar nëpërmjet blerjes së 5% të aksioneve të shoqërisë Regjistri Shqiptar i Titujve Alreg SHA nga shoqëria Banka Credins SHA”

Komisioni i Konkurrencës me pjesëmarrjen e:

Znj. Juliana LATIFI	Kryetar
Z. Eduard YPI	Zv/Kryetar
Znj. Leida MATJA	Anëtar
Znj. Adriana BERBERI	Anëtar
Z. Helidon BUSHATI	Anëtar

Në mbledhjen e tij të datës 06.04.2020, shqyrtoi çështjen me:

Objekti: Autorizimi i përqendrimit të realizuar nëpërmjet blerjes së 5% të aksioneve të shoqërisë Regjistri Shqiptar i Titujve Alreg SHA nga shoqëria Banka Credins SHA.

Baza Ligjore: Ligji Nr. 9121, datë 28.07.2003 “Për Mbrojtjen e Konkurrencës”, i ndryshuar, nenet 2, 10-12, neni 24, germa d, dhe nenet 53-64. Rregullorja “Për zbatimin e procedurave të përqendrimit të ndërmartjeve”, Udhëzimi “Për formën e njoftimit të përqendrimit” dhe formulari i njoftimit të përqendrimit.

Komisioni i Konkurrencës, pas shqyrtimit të relacionit të Sekretarit të Përgjithshëm si dhe raportit të Drejtorisë së Analizës dhe Metodologjisë, mbi njoftimin e përqendrimit të realizuar nëpërmjet blerjes së 5% të aksioneve të shoqërisë Regjistri Shqiptar i Titujve Alreg SHA nga shoqëria Banka Credins SHA.

VËREN SE:

Transaksioni dhe përqendrimi

Autoriteti i Konkurrencës është njoftuar në lidhje me transaksionin e blerjes së 5% të aksioneve të shoqërisë Regjistri Shqiptar i Titujve Alreg SHA nga shoqëria Banka Credins SHA.

Pala blerëse: Banka Credins SHA, është një shoqëri aksionare e organizuar në përputhje me legjislacionin shqiptar, e cila vepron si bankë e nivelit të dytë në përputhje me Licencën e

Aktivitetit bankar nr.16, datë 31.03.2003, lëshuar nga Banka e Shqipërisë, me objekt veprimtarie; Veprimtaritë bankare dhe financiare.

Banka zotërohet nga 51 aksionare nga të cilët me më shumë se 5% të kapitalit janë Renis Teršana 24.3 %; Aleksandër Pilo 16.68 % dhe B.F.S.E. Holding B.V., Hollandë 14.48%.

Pala shitëse: Z.Artan Gjergji, individ, i cili zotëron 5% të kapitalit të shoqërisë Regjistri Shqiptar i Titujve Alreg SHA.

Shoqëria Target: Regjistri Shqiptar i Titujve Alreg SHA, është një shoqëri e organizuar në përputhje me legjislacionin shqiptar, me objekt veprimtarie; Kryerja e veprimtarisë së regjistrarit të titujve për të gjithë titujt e lejuar sipas ligjit për titujt dhe në përputhje me licencën e dhënë nga Autoriteti i Mbikëqyrjes Financiare. Shoqëria do të mbaje regjistrat e titujve, do të organizojë dhe administrojë të dhënat mbi të gjitha llojet e titujve, sipas përcaktimeve dhe kufizimeve të Ligjit për titujt dhe të licencës përkatëse, si dhe do të kryejë emërtimin dhe kodifikimin e titujve sipas praktikave më të mira kombëtare dhe ndërkombëtare. Shoqëria do të ofrojë shërbimin e regjistrimit të titujve duke bërë të mundur që të sigurohen në çdo kohë të dhëna të plota për pronësinë mbi titujt e regjistruar, si dhe kufizime të të drejtave të pronësisë mbi to. Shoqëria do të kryejë të gjitha veprimtaritë e regjistrarit të titujve të parashikuara nga Ligji për Titujt dhe aktet nënligjore në zbatim. Shoqëria do të ushtrojë veprimtarinë e klerimit dhe shlyerjes së titujve si operator i sistemit të shlyerjes së titujve, në përputhje me kuadrin ligjor dhe rregullativ në fuqi.

Shoqëria zotërohet nga Banka Credins SHA me 47,5% të kapitalit, Banka Amerikane e Investimeve SHA me 47,5% të kapitalit dhe Z.Artan Gjergji me 5% të kapitalit.

Më datë 17 Tetor 2019, midis palës blerëse, Banka Credins SHA, dhe palës shitëse Z.Artan Gjergji është nënshkruar “Kontratë Shitje Aksionesh”, me objekt kalimin e pronësisë, nëpërmjet shitjes së paketës prej 5% të kapitalit tek blerësi. Pas transaksionit, Banka Credins SHA do të zotërojë 52,5% të kapitalit të shoqërisë Regjistri Tregtar i Titujve Alreg SHA dhe Banka Amerikane e Investimeve SHA do të zotërojë 47,5% të kapitalit

Palët në transaksion plotësojnë kriteret e përcaktuar në nenin 10 dhe nenin 12 të Ligjit Nr. 9121, datë 28.07.2003 “Për Mbrojtjen e Konkurrencës”, i ndryshuar dhe si rrjedhojë ky transaksion është objekt autorizimi nga Komisioni i Konkurrencës.

Vlerësimi i përqendrimit

Referuar nenit 3, pika 7, të Ligjit Nr. 9121, datë 28.07.2003 “Për Mbrojtjen e Konkurrencës”, i ndryshuar, si edhe Udhëzimit Nr.76, datë 07.04.2008 “Për përcaktimin e tregut përkatës”, treg përkatës i produktit do të konsiderohet tregu i titujve dhe treg përkatës gjeografik u konsiderua territori i Republikës së Shqipërisë.

Tregu i titujve është një treg i rregulluar. Autoriteti i Mbikëqyrjes Financiare së bashku me Bankën e Shqipërisë janë dy institucionet rregullatore dhe mbikëqyrëse të sistemit financiar shqiptar.

Titujt janë instrumente financiare, të cilat emetohen dhe tregtohen për sigurimin e fitimit, nëpërmjet administrimit të të drejtave, që rrjedhin nga zotërimi i tyre. Në termin “tituj” përfshihen pa kufizim aksionet, obligacionet e shoqërive tregtare dhe të pushtetit vendor, bonot e thesarit dhe

obligacionet e emetuara nga shteti shqiptar, titujt e emetuar nga Banka e Shqipërisë, dëftesat tregtare, aksionet ose kuotat e fondeve të investimit, si dhe instrumente të tjera financiare, të krahasueshme me aksionet dhe obligacionet dhe që vlerësohen dhe miratohen si të tilla nga Autoriteti i Mbikëqyrjes Financiare

Shoqëria blerëse, Banka Credins SHA, është e licencuar nga AMF, në tregun e titujve, si shoqëri këshillimi dhe kujdestare e letrave me vlerë të Qeverisë së RSH dhe i obligacioneve të shoqërive aksionare dhe të qeverisë vendore, ndërkohë që Alreg do të operojë vetëm në veprimtarinë e regjistrarit të titujve, për të gjithë titujt e lejuar sipas ligjit për titujt.

Referuar pasqyrave financiare të administruara, konstatohet se shoqëria Alreg SHA nuk ka realizuar të ardhura nga aktiviteti ekonomik në tre vitet e fundit.

Përqendrimi nuk do të krijojë mbivendosje horizontale mes palës blerëse dhe shoqërisë target. Pala blerëse, sikurse dhe subjektet e tjera të licensuar në tregun e titujve, do të përdorin bazën e te dhënave të shoqërive “regjistrarë të titujve”, për të realizuar transaksionet financiare në tregun e titujve. Për këto arsye, transaksioni i synuar nuk do të sjellë asnjë ndryshim në tregun shqiptar.

PËR KËTO ARSYE:

Komisioni i Konkurrencës, në bazë të nenit 24, shkronja d dhe nenit 56 pika 1 të Ligjit Nr. 9121, datë 28.07.2003 “Për Mbrojtjen e Konkurrencës”, i ndryshuar,

VENDOSI:

1. Të autorizojë përqendrimin e realizuar nëpërmjet blerjes së 5% të aksioneve të shoqërisë Regjistri Shqiptar i Titujve Alreg SHA nga shoqëria Banka Credins SHA.
2. Ngarkohet Sekretari i Përgjithshëm për njoftimin e palëve dhe dërgimin e vendimit pasi të bëhen pagesat që parashikon rregullorja “Për caktimin e shpenzimeve për ndjekjen e procedurave pranë Autoritetit të Konkurrencës”.

Ky vendim hyn në fuqi menjëherë.

KOMISIONI I KONKURRENCËS